

NJOFTIM
Nr. 177, datë 14.1.2026

PËR HAPJEN E PROCEDURAVE TË APLIKIMIT PËR AUTORIZIMIN E ORGANIZATAVE JOFITIMPRURËSE QË DO TË OFROJNË NDIHMË JURIDIKE PARËSORE TË GARANTUAR NGA SHTETI

Drejtoria e Ndhmës Juridike Falas, në bazë të ligjit nr. 111/2017, “Për ndihmën juridike të garantuar nga shteti”, dhe të VKM-së nr. 55, datë 6.2.2019, “Për përcaktimin e procedurave dhe dokumentacionit për autorizimin e organizatave jofitimprurëse, që ofrojnë ndihmë juridike parësore të garantuar nga shteti” (i përditësuar), bën publik njoftimin, si më poshtë:

Të gjitha organizatat jofitimprurëse që janë të interesuara të aplikojnë për të marrë autorizim nga ministri i Drejtësisë për të ofruar ndihmën juridike parësore, duhet të plotësojnë kriteret ligjore të përcaktuara në nenin 15 të ligjit nr. 111/2017 “Për ndihmën juridike të garantuar nga shteti”.

Shënim. Kjo thirrje është për organizatat e reja që dëshirojnë të bëhen pjesë e rrjetit të ofruesve të shërbimit të ndihmës juridike parësore dhe jo për ato të autorizuar më parë nga ministri i Drejtësisë, në kushtet kur me ndryshimet e VKM-së nr. 55/2019, autorizimi jepet pa afat.

Procedura dhe dërgimi i dokumentacionit

Dokumentacioni që duhet të depozitohet nga organizatat jofitimprurëse (OJF), për aplikim për marrjen e autorizimit që lëshohet nga ministri i Drejtësisë, për të ofruar shërbime të ndihmës juridike parësore të garantuar nga shteti, përmban:

Dokumentacionin që provon përvojë në ofrimin e ndihmës juridike parësore, të paktën në 3 (tre) vjet të veprimtarisë së tyre *(nuk është e domosdoshme të jenë projekte të 3 vjetëve të fundit, por kohëzgjatja e projekteve në total të mbulojë një periudhë kohore prej 3 vjetësh kalendarikë)*, duke përfshirë:

- Listën e rasteve të trajtuara ose projekteve të ndihmës juridike parësore të zhvilluara nga organizata gjatë 3 (tre) vjetëve, si dhe të dhëna statistikore për përfituesit e ndihmës parësore nga projektet e ndihmës juridike parësore;

- Raportet përfundimtare për secilin rast, ose raportet vjetore për projektet e listuara për ofrimin e ndihmës juridike parësore, si dhe pasqyrat financiare për to;

- Në rast se organizata jofitimprurëse nuk ka zbatuar një projekt të posaçëm për ofrimin e ndihmës juridike parësore, por ky aktivitet është një komponent i një projekti tjetër, paraqiten dokumentet vetëm për këtë komponent, që lidhet me ofrimin e ndihmës juridike parësore;

- Pasqyrat financiare të 3 (tre) vjetëve të fundit të konfirmuara nga Drejtoria e Përgjithshme e Tatimeve; buxhetin total të secilit projekt, donatorët përkatës, si dhe listën e ekspertëve të brendshëm e të jashtëm, të përfshirë në këto projekte;

- Tabelë ku të evidentohen anëtarët e organit më të lartë vendimmarrës dhe të organit ekzekutiv;

- Formularin e vetëdeklarimit të gjendjes gjyqësore të anëtarëve të organit më të lartë vendimmarrës dhe të organit ekzekutiv *(i përditësuar i 3 muajve të fundit)*;

- Adresën elektronike të komunikimit të organizatës dhe numrin e kontaktit të përfaqësuesit.

Aplikimi për autorizim i shoqëruar me dokumentacionin e sipërpërmendur dorëzohet pranë Drejtorisë së Ndhmës Juridike Falas, në adresën rruga “Jordan Misja”, godina nr. 3, Njësia Bashkiake nr. 9, Tiranë, **brenda 30 ditëve nga data e publikimit** të njoftimit në Buletinin e Njoftimeve Zyrtare në Qendrën e Botimeve Zyrtare (QBZ)

Dokumentet e sipërcituara duhet të jenë **origjinale** ose të **njësuar me origjinalin**. Aplikimet e paraqitura jashtë afatit dhe/ose jo në formatin e kërkuar nuk kualifikohen. Për çdo paqartësi mund të na kontaktoni në: dnjf@drejtesia.gov.al.